

## AUGLÝSING

### um staðfestingu á verklagsreglum Bændasamtaka Íslands um stuðning við nýliðun í mjólkurframleiðslu.

Með vísan til 11. gr. reglugerðar nr. 1084/2012 um greiðslumark mjólkur á lögbylum og greiðslur til bænda verðlagsárið 2013 og samnings um starfsskilyrði mjólkurframleiðslu, dagsetts 10. maí 2004, með síðari breytingum, hafa Bændasamtök Íslands sett verklagsreglur um stuðning við nýliðun í mjólkurframleiðslu. Reglurnar öðlast gildi við birtingu. Auglýsing þessi kemur í stað auglýsingar nr. 497/2012 um staðfestingu á verklagsreglum Bændasamtaka Íslands um stuðning við nýliðun í mjólkurframleiðslu sem birt var í Stjórnartíðindum 29. maí 2012.

Reglurnar eru birtar í Stjórnartíðindum sem fylgiskjal með auglýsingu þessari.

*Atvinnuvega- og nýsköpunarráðuneytinu, 27. ágúst 2013.*

F. h. sjávarútvegs- og landbúnaðarráðherra,

**Halldór Runólfsson.**

*Rebekka Hilmarsdóttir.*

### Fylgiskjal.

#### VERKLAGSREGLUR um stuðning við nýliðun í mjólkurframleiðslu.

Reglur þessar fjalla um stuðning við nýliðun í mjólkurframleiðslu af lið 6.4, „Óframleiðslu- tengdar og/eða minna markaðstruflandi greiðslur“ í samningi um starfsskilyrði mjólkurframleiðslu, dagsettum 10. maí 2004, með síðari breytingum. Kveðið er á um árlega heildarupphæð fjármuna sem eru til ráðstöfunar í reglugerð um greiðslumark mjólkur á lögbylum og greiðslur til bænda eins og hún er hverju sinni.

##### 1. gr.

Einstaklingur sem er að hefja rekstur kúabús í mjólkurframleiðslu í eigin nafni eða kaupir eða eignast meirihluta í lögaðila eða félagsbúi sem rekur kúabú í mjólkurframleiðslu getur sótt um framlag samkvæmt reglum þessum að fjárhæð allt að 5 milljónir króna við upphaf búskapar. Þá getur lögaðili eða félagsbú einnig sótt um framlag samkvæmt reglunum. Heimilt er að skipta útgreiðslu framlags á tvö ár.

Þá er heimilt að veita framlag til umsækjanda sem eignast meirihluta í lögaðila eða félagsbúi innan tveggja ára frá upphafi fyrstu kaupa hlutafjár í lögaðila eða myndun eignarhluta í félagsbúi, eigi þau sér stað eftir 31. desember 2012.

Einstaklingur eða lögaðili getur aðeins fengið framlag um stuðning við nýliðun í mjólkurframleiðslu einu sinni á búskapartíð sinni. Hjón og sambýlisfólk teljast einn aðili í skilningi þessara reglna.

##### 2. gr.

Framlög eru veitt til nýliða í mjólkurframleiðslu. Einstaklingur sem uppfyllir neðangreind skilyrði telst nýliði í skilningi þessara reglna:

- Hefur ekki áður verið skráður handhafi beingreiðslna samkvæmt samningi um starfsskilyrði mjólkurframleiðslu á síðustu átta árum, talið frá 1. janúar þess árs sem umsókn um framlag er lögð inn.
- Hefur ekki lagt inn mjólk eða verið eigandi að félagsbúum eða lögaðilum sem rekið hefur kúabú í mjólkurframleiðslu á síðustu átta árum, talið frá 1. janúar þess árs sem umsókn um framlag er lögð inn.
- Hefur ÍSAT-númer í búnaðargjaldsskyldri búgrein og opið virðisaukaskattsnúmer.

- d) Reiknar sér endurgjald eða er launþegi við reksturinn.
- e) Er aðili að gæðastýrðu skýrsluhaldi í nautgriparékt og uppfyllir kröfur þess.

Lögaðili eða félagsbúi sem uppfyllir framangreind skilyrði í a.-e. lið 1. mgr. telst nýliði í mjólkurframleiðslu en ennfremur mega eigendur lögaðila eða félagsbús ekki hafa verið handhafar beingreiðslna samkvæmt samningi um starfsskilyrði í mjólkurframleiðslu, lagt inn mjólk eða átt eignarhlut í öðrum félagsbúum eða lögaðilum sem rekið hafa kúabú í mjólkurframleiðslu á síðustu átta árum, talið frá 1. janúar þess árs sem umsókn um framlag er lögð inn.

### 3. gr.

Þeir sem uppfylla skilyrði 2. gr. og hefja rekstur kúabús mjólkurframleiðslu það ár sem umsókn er lögð inn, geta sótt um framlög, sjá þó 2. mgr. 1. gr. reglnanna. Umsóknum skal skilað á eyðublöðum sem Bændasamtök Íslands láta í té.

Ár hvert, eigi síðar en 15. september, auglýsa Bændasamtök Íslands, t.d. í Bændablaðinu, eftir umsækjendum um framlög vegna stuðnings við nýliðun í mjólkurframleiðslu. Umsóknum skal skilað á skrifstofu Bændasamtaka Íslands á sérstökum eyðublöðum sem samtökin láta í té, eða á rafrænu formi, eigi síðar en 15. október ár hvert.

Í umsókn um framlög skulu koma fram upplýsingar um nafn, kennitölu og heimilisfang umsækjanda og búsnúmer. Jafnframt skal umsækjandi leggja fram gögn um að hann hafi ÍSAT-númer í búnaðargjaldsskyldri búgrein og opið virðisaukaskattsnúmer. Þá skal fylgja staðfesting á reiknuðu endurgjaldi eða launaseðlar, staðfest hlutaskrá ef um lögaðila er að ræða og staðfesting á eignarhlutdeild í félagsbúi ef um það er að ræða.

Umsóknum skal skilað á skrifstofu Bændasamtaka Íslands eða með rafrænum hætti fyrir 15. október ár hvert og skal uppgjör hafa farið fram fyrir 31. desember ár hvert.

Bændasamtökum Íslands er heimilt að afla upplýsinga um umsækjanda úr handhafaskrá og skrá yfir þá sem leggja inn mjólk. Bændasamtökum Íslands er einnig heimilt að kalla eftir upplýsingum um aðild að mjólkurframleiðslu frá afurðastöðvum að fengnu samþykki umsækjanda. Þá er Bændasamtökum Íslands heimilt að krefja umsækjanda um önnur þau gögn sem þau telja nauðsynleg vegna afgreiðslu umsóknarinnar.

### 4. gr.

Bændasamtök Íslands annast afgreiðslu umsókna. Greiðslum er jafnað á umsækjendur með eftirfarandi hætti:

- a) 20% þeirra fjármuna sem til ráðstöfunar eru er skipt jafnt á umsækjendur.
- b) 80% þeirra fjármuna sem til ráðstöfunar eru, skal greiða með skírskotun til gripafjölda þannig að miðað verði við fjölda árskúa leiðrétt fyrir fjölda skýrsluhaldsmánaða. Þannig fær umsækjandi sem hefur framleiðslu 1. júní og skilar skv. skýrsluhaldi skýrslum fyrir 15 árskýr greitt á:  $15/7$  (fjöldi skýrsluhaldsmánaða) \*  $12 = 25,7$  kýr.
- c) Nýliði fær greiðslur á árskýr í samræmi við eignarhlut sinn í búinu ef um lögaðila eða félagsbúi er að ræða.

### 5. gr.

Láti framlagsþegi af búskap innan fimm ára frá veitingu framlags skal hann endurgreiða framlagið hlutfallslega. Endurgreiðsla framlags skal verðtryggð með sama hætti og greiðslur samkvæmt samningi um starfsskilyrði mjólkurframleiðslu, dagsetum 10. maí 2004 með síðari breytingum, frá greiðsludegi framlagsins. Bændasamtökum Íslands er heimilt að krefja framlagsþega um upplýsingar til staðfestingar á rekstri og aðild að kúabúi í mjólkurframleiðslu á þessu fimm ára tímabili.

*Reykjavík, 26. ágúst 2013.*

F.h. Bændasamtaka Íslands,

**Eiríkur Blöndal.**